



UPA 2014-172

14.05.2014

Aqqaluaq B. Egede

**Inuiatigiit kissaataat tunngavigalugit nunap ilaani aatsitassarsiorfissanik inerisaaviusussanik pilersitsinissaq aammalu nunap inaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfeqarusunngitsunik pilersitsinissaq pillugu oqallinnissamik saqqummiussequllugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Oqallisssiaq innuttaasunik, soqutigisaqaqatigiinnit aalajangiisartunillu peqataatitsinikkut amerlasuunik akuuffigineqartumik oqallinnissamut toqqammaviussaaq. Oqallisssiaq 2015-imi upernaakkut ataatsimiinnissaq nallertinnagu naammassineqareersimassaaq.**

(Inuit Ataqatigiit Inatsisartuni gruppianni ilaasortat)

Inuit ataqatigiit siunnersuuteqarpugut isumaqaratta aatsitassarsiorneq pillugu inuiatigiit isummersoqataatinneqarnerat amigartoq. Aamma nunatsinni inuiatigiittut suli perarfissaqarsimanngilagut nunatta aatsitassarsiorfinngussaguni qanoq atorneqarnissaa pillugu isummersornissatsinnut. Apeqquterpassuit naalakkersuisutigoortumik tamarmik aalajangersarneqarput. Pissutsit taamaannerat Inuit Ataqatigiit aaqqiissutissarserusuppavut.

Allatut oqaatigalugu inuiatigiit taakuussapput nunatta qanoq atorneqarnissaannik aalajangeeqataasussat. Oqartussaaqataaneq siammasissoq, inuillu peqataatinneqarlutik isummaminnek apuussaqarsinnaanerat nukittorsarumavarput. Aamma Inuit Ataqatigiit isumaqarpuget aalajangiisoqassatillugu nunatsinni inuit kattuffiit ilaasortaaffitik, suliniaqatigiiffiit, imaluunniit peqatigiiifiit ilaasortaaffitik aaqtigalugit sunnuteqarnerusinnaanngornissaat.

Tamanna aamma kattuffinnut ilaasortaaffeqarnissamik kajumissuseqalersitsinermut aaquaassasoraarput. Tassami kattuffiit assigisaallu nukittuumik inissimalissapput, aamma aalajangersaanermi tusarniaaffiuinnaratik inuiat qanimut oqartussaaqataanerannik timitaliiniarnitsinni suleqataalissammata.

Nunatta sineriaa, aamma inoqarfiit nunatsinni inuussutissarsiutitigut assigiinngisitaartunik perarfissaqarput. Assigiinngitsunik perarfissaqarnerput, nunatta qanoq atorneqarnissaannik assigiinngisitaartumik nunamik atuinissaq pillugu aalajangersaanissaq pisariaqartileraa Inuit Ataqatigiit isumaqarpuget. Isumarput imaappoq, tulluartuussanngitsoq imaani aalisarfinni uuliasiorfissuarmik ammaasoqassappat.

Tulluassanngilaq nersutaateqarnermik uumasuuteqarnermillu inuussutissarsiorfiusuni aatsitassarsiorfissuarmik ammaanissaq. Sumiiffinni inuussutissarsiornikkut avatangiisink eriaginninnissamik pisariaqartsitsiviusuni avatangiisit eriagineqarnissaat pisariaqarmat. Taamaattumik Inuit Ataqatigiit Inatsisartut partiillu allat suleqatiseriumallugit siunnersuut eqqartugarput akuersaarparput.

Inuaat amerlanngilagut. Immitsinnut illersortariaqarpugut. Immitsinnut illersussagutta inuussutissarsiutit nammineq pilersissimasavut, aamma qangaaniilli ineriertortissimasavut aatsitassarsiuernissamut akigineqarnissaat pinngitsoortittariaqarparput.

Eqqarsariaaseq taamaattoq Naalakkersuisut ilalinngilaat, siunnersuulli manna itigartinneqassasoq inassutigivaat. Naalakkersuisut aamma naalakkersuisooqatigiit, naak inuit nunatsinni oqartussaaqataanerulernissaannik neriorsuutisi timitalerneqarfissaat? Naak inuinnaat naalakkersueqataanissaannik neriorsuutisi?

Taakkummatami Inuit Ataqatigiit siunnersuuteqarnitsinni suleqataaffigerusutavut. Neriuppunga naalakkersuisooqatigiit aamma naalakkersuisooqatigiit partiivisa Inatsisartunut ilaasortaatitaai oqaaseqarnissamut periarfissaq atorlugu tamanna nassuiassagaat. Oqarluartaarneq oqarluartaarnerus-sangippat tunngavilersuutisi tusarusunnassaqaat.

Naalakkersuisummi akissuteqaataani tunngavilersuutit pingarnerit tassaapput selskabit aatsitassarsiorniat periarfissarissaartinneqarnissaat. Tamanna killormuuliorlugu Inuit Ataqatigiit siunnersuuteqarpugut, tassalu inuiaqatigiit inuussutissarsiutaat aamma nunamik qanoq atuiniarnerat periarfissaris-saartuaqqullugu iliuuseqarniaratta. Tamanna Naalakkersuisut itigartippaat. Naak inuiaqatigiit ataatsimut peqatigiilluta, aamma oqartussaaqatigiinneq tunngavigalugu nunatta qanoq atorneqarnissaa tunngavilersorniassagatsigu.

Siunnersuut aqqutigalugu inuit nunatsinniittut periarfissinniarpagut, nunaminni ineriertorneq qanoq ingerlassanersoq isummersinnaaqqullugit. Naalakkersuisulli itigartitsiniarnerminni tunngavilersuutigisaat teknologi-mut, industriimut aammalu selskabit qanoq kajumissuseqarnerannik innarliinaveersaarnermik tunngavilersugaapput. Aalisartut, savaatillit, takornarialerisut, inuussutissarsiutit allat, aamma inuit sumiiffimminni avatan-giisertik qanoq atorneqassanersoq qanorlu piumasaqarnerat soq tusaaniar-neqassanngillat?

Inuit Ataqatigiit kaammattutigaarput, aatsitassarsiornermik inuussutissarsiorneq ineriertussasoq partiit akimorlugit suleqatigiinnikkut. Suleqatigiinnerli aallaaveqassasoq inuaat nunatsinni qanoq piumasaqarnerat naapertorlugu. Naapertuilluarnerli tassaassasoq inuaat aalajangigaat toq-qammavigalugit naalakkersuinikkut ingerlatsineq. Tassami aatsitassarsiuernissarput suaarutigigatsiguli suliassaq siulleq nunatta avataanut ikiortissarsiorneq. Suli immitsinnut aperinikuunngilagut nunarput qanoq ineriertortissanerlugu, aamma qanoq suleqatigiinnerulluta ingerlanissarput suli oqallisiginngilarput.

Taamaammat siunnersuut una periarfissatsialaavoq inuiattut ataatsimoorerulernissatsinnik aqqutissiuinissamut. Periarfissatsialaavoq nunatsinni inuit

piumasaqaateqartissallugit ukiuni tulliuttuni naalakkersuinikkut suliassat qanoq isikkoqarnissaannik timitalersuinissamut. Naalakkersuinikkut akerle-riinneq qimanneqaqqullugu, inuiattullu ataatsimoornerulluta sulinissarput katersuuffiuleqqullugu.

Inuit Ataqatigiit niuppugut Inatsisartunut ilaasortat isummersoqatigiinnermikkut inerititaqarluassasut. Inuaat kissaataat tunngavigalugit naalakkersuinikkut ingerlatsinissaq neriulluta katersuuffiussasoq. Taamatut oqaaseqarluta Inuit Ataqatigiit inassutigissavarput siunnersuut Inatsisartut Inuussutissarsiornermut Ataatsimiititaliaannut ingerlatinneqassasoq.